

**ARUBA BANK A PATROCINA
CU ORGUYO E FESTIVAL UN
CANTO PA ARUBA SU HIMNO
Y BANDERA 2025**



WWW.SOLODIPUEBLO.COM



SOLODIPUEBLO@GMAIL.COM

**HUES KIER MAS INVESTIGACION DEN CASO CU
TATA Y OPA LO A ABUSA DI MENOR DI EDAD**

**HOBEN DI 19 AÑA CONDENA NA 5 AÑA DI PRISON
PA TIRA RIBA AUTO Y HERIDA UN DAMA**

**POLIS A TOPA UN PAREHA
CU AUTO DI HUUR PEGA
DEN SANTO BLANCO NA
EAGLE BEACH**



**DESCONOCIDONAN A
AGREDI HOBEN DJ NA UN
SNACKTRUCK NA
PALM BEACH**



**EVELYN WEVER-
CROES RIBA DIA DI
HIMNO Y BANDERA**
“Un pais sin su Bandera
y sin su Himno ta un
pais sin destino”




PATRAS DI CAS DI CULTURA DURANTE TRAINING UN MUCHA DI 18 AÑA A CAY FLAUW



Diasabra mainta a drenta informe di cu durante training un mucha di 18 aña a cay flauw y ainda ta benta riba vloer na Cas di Cultura, mesora a dirigi un ambulans na e sitio. Na yegada di e ambulans nan a atende e mucha y a transporte pa hospital.



EKIPO DI ARUBA BANK A PARTICIPA DEN E DI TORNEO DI GOLF CARITATIVO ANUAL DI KIWANIS CLUB OF ARUBA




Oranjestad – 17 di maart 2025 - Aruba Bank a participa den e 15 edicion di torneo di golf caritativo anual, organisa pa Kiwanis Club of Aruba cu a tuma lugar diadomingo na The Links at Divi Aruba.

Ekipo di Aruba Bank representado di Herman, Lucio, Bryan, y Ryan, a representa Aruba Bank cu gran orguyo, apoyando e evento significativo aki cu ta stimula involucracion

den comunidad conhuntamente cu hacimento di donacion.

Aruba Bank ta contento di por a forma parti di un evento cu ta fortalece e lazo di comunidad.



Pabien na Kiwanis Club pa organisa un evento asina impactante y tur esnan cu a contribui na su exito.



NoticiadiCorte

HUES KIER MAS INVESTIGACION DEN CASO CU TATA Y OPA LO A ABUSA DI MENOR DI EDAD

ORANJESTAD – Corte di Husticia a cuminsa trata e caso penal cu Ministerio Publico a cuminsa contra e homber H.W.(73). E ta wordo acusa di a abusa di su nieta menor di edad.

SOLO DI PUEBLO por a compronde cu Hues, despues di a consulta cu Fiscal y abogado, a dicidi pa pospone e caso pa haci mas investigacion. E kier pa interroga testigo pa haya claridad kico realmente a pasa.

E acusacion contra H.W. ta cu entre 2015 y 2018, e lo a abusa di su nieta J. menor di edad. Hues a bisa tanto Fiscal como abogado cu e victima J. no a presenta y tampoco e mama pasobra nan no kier duna declaracion den Corte. Hues a bisa cu segun ley, ta un hende cu tin e autorizacion di e mucha y mayor por duna declaracion. Hues a bisa cu e pregunta ta kico mester haci. El a bisa cu hende di slachtoffer hulp tambe lo por papia pa e mucha.

KIER MAS INTEROGACION

Hues a bisa cu H.W. ta para riba cu e no a haci nada. Hues a muestra cu tin 1 di e 3 testigonan ta

bisa cu el a tende J. papia di e abuso y tambe e testigo ta bisa cu un biaha so e sospechoso H.W. a bis'e cu el a haci'e. Hues ta haya cu e parti aki no a wordo suficiente investiga. E ta haya cu mester tin mas claridad riba e declaracion di e testigo. Na opinion di Hues, si bay trata e caso awor, e chens ta grandi cu tin buraco habri den e caso. Hues a bisa cu H.W. lo por bisa cu e no a haci nada pero e otronan si. Cu e otronan kieren e tata di J. y e otro opa.

POSPONE CASO PA SCUHA TESTIGO

Fiscal su punto di bista ta, pa laga scucha testigo. Na opinion di Fiscal, e victima a bisa KZP cu su tata y su opa a haci algo cun'e. E ta haya cu tin posibilidad cu lo haya un hende autoriza pa lesa declaracion di e victima. Abogado mr. Zara cu a ocupa pa mr. Mohamed a bisa cu e no tin nada contra pa pospone e caso. E abogado a muestra cu H.W. ya caba tin 7 luna encarcela y e ta haya cu lo por laga H.W. liber pendiente di e caso cu condicionnan stipula pa Hues entre otro cu e no por bay papia cu e victima y famia. Fiscal a

remarca cu e interes di H.W. no por ta pisa mas cu e interes di e caso penal. E ta haya cu no por laga H.W. liber.

Hues a dicidi cu lo pospone e caso. Hues a bisa cu un testigo a bisa cu tanto e tata, e opa y H.W. a haci actonan immoral. Hues ta haya cu no mester bay interroga e tata y e opa. Hues ta haya cu si mester interroga e testigo cu e bisa cu el a tende di H.W. bisa cu e tambe a mishi cu e mucha. Hues a bisa cu e ta manda e caso pa Hues Comisario pa scucha testigo y Hues lo instrui Hues Comisario kico lo mester interroga e testigo. Ademas Hues a instrui Fiscal pa mira si e mucha y e mama no kier bin Corte, pa busca un persona cu ta haya e autorizacion pa por papia pa e mucha y mama. Hues a bisa cu e kier pa mas pronto posibel e investigacion tuma lugar y e caso keda trata. Hues a rechaza e peticion pa laga H.W. liber y a bisa cu 13 Juni 2025 pa 8.30 lo sigui cu e caso.


DAMA CHAUFFEUR A BAY BIRA SIN A MIRA MOTOCICLISTA TA BINI NA BUBALI



Diabierna anochi a drenta informe di un accidente cu hende herida dilanti "E Boco" na Bubali, mesora a dirigi tanto polis como ambulans na e sitio. Na yegada di e patrulla a bin compronde cu aki ta trata di un accidente unda e dama chauffeur di un Toyota Tercel a bay bira pero no a mira e motociclista ta bini y esaki a bay dal riba dje.

Debi na e impacto y caida e motociclista tabata keha di dolor na su pia.

Na yegada di e ambulans nan a atende y a transporte pa hospital.





Noticia di Corte

HOBEN DI 19 AÑA CONDENA NA 5 AÑA DI PRISON PA TIRA RIBA AUTO Y HERIDA UN DAMA

ORANJESTAD – E hoben C.H. (19) a presenta dilanti Hues pa scucha su sentencia. E ta wordo acusa di a purba mata dos hende door di tira riba un auto.

SOLO DI PUEBLO por a compronde cu Fiscal a exige 7 aña di prison pa C.H., kende Fiscal ta haya culpabel di purba mata dos hende. Hues ta haya C.H. culpabel pero a baha e castigo exige pa Fiscal.

TIRAMENTO DEN DIA CLA

Dia 6 di Maart 2025 tratamiento di e caso a tuma lugar caminda Fiscal a bisa cu dia 19 Juni 2024 mas o menos 2'or di merdia, 2 miembro di team di narcotica a mira con dos hoben cu flanel bisti tabata lucha cu un homber lomba sunu y despues nan a core bay. E homber lomba sunu a subi su auto y core nan tras. No mucho leu, a scucha tiro. E agentenan a bisa cu nan a mira C.H. ta core cu un revolver den man. Na opinion di Fiscal, camera di seguridad ta

monstra cu ningun momento e glas di e auto, en especial na parti di chofer, a baha. Fiscal a sigui bisa cu C.H. a tira riba e auto y herida e dama Hulandes D. na man. C.H. a tira dirigi y esey a causa cu e dama D. a resulta herida. Fiscal ta considera esaki, cu C.H. a purba mata. Fiscal ta haya legalmente proba cu C.H. a purba mata e dama D. y un homber cu a keda desconoci. Na opinion di Fiscal den e caso aki no por bisa cu C.H. a actua den defensa propio. E ta haya C.H. culpable di posesion di un revolver Caliber 38.

Fiscal a exige 7 aña di prison.

HUES TA PREOCUPA

Hues den su sentencia a bisa cu C.H. a admiti pero abogado mr. Hernandez a haci apelacion riba defensa propio. Segun e abogado, e chofer di e auto a baha glas di e auto y kier a tira riba C.H. E momento ey C.H. a tira.

Hues a bisa cu e no ta kere e storia ey. Segun Hues riba camera di seguridad, no ta mira cu

e glas di auto tabata habri y hasta e parti cu C.H. ta bisa cu e auto tabata tras di un mata, e periodo tabata mucho cortico. Hues ta haya C.H. culpable di a purba mata dos hende. El a bisa cu e dama Hulandes a resulta herida na su braza. Hues a sigui bisa cu ademas C.H. ta culpable di tabatin un arma.

Hues ta haya cu C.H. no tin respet pa bida di hende. Hues a bisa cu e ta preocupa con C.H. ta cana cu arma rond. El a bisa cu abogado a pidi pa aplica ley hubenil, mirando cu net C.H. a cumpli 19 aña. Hues a bisa cu e no ta mira motibo pa haci esey.

CASTIGO

Hues a bisa cu e ta tene cuenta cu ta promer biaha cu C.H. ta cay cera. Tambe Hues a bisa cu C.H. ta jong y mester dun'e chens pa drecha su bida. Hues a condena C.H. na 5 aña di prison, kitando e tempo cu e ta cera den KIA.

ACCIDENTE HIT & RUN NA TANKI LEENDERT



Diasabra atardi a drenta informe di un accidente na Tanki Leendert, mesora a dirigi un patruya na e sitio. Na yegada di e patruya a bin compronde cu aki ta trata di un accidente hit & run unda cu un auto

a bay dal tras di e Honda Civic dilanti Rococo Plaza y a bandona e sitio. Awor polis lo mester bay busca e auto cu a causa e accidente aki ya cu tin varios camara di seguridad den e area ey.

ARUBA BANK A PATROCINA CU ORGUYO E FESTIVAL UN CANTO PA ARUBA SU HIMNO Y BANDERA 2025



Oranjestad – 18 di maart 2025 - Aruba Bank a patrocina e di 28 edicion di Festival Un Canto Pa Aruba Su Himno y Bandera 2025 - Adulto. Como un sostenedor dedica na e herencia cultural di Aruba, Aruba Bank ta honra di por a patrocina e premio pa e ganador absoluto di evento cultural importante aki.

E festival, cu ta celebra e identidad nacional di Aruba via musica y folklore, a tuma lugar fin di siman na Plaza Libertador G.F. Betico Croes. E evento a enfoca riba e importancia di preserva y promove e musica tradicional di e isla, cu categorianan

special pa reconose tanto composicionnan moderno como tambe tradicional (Tipico di Antes).

Como patrocinado di e ganador, Aruba Bank a reafirma su compromiso pa stimula talento local y promove expresion cultural. E banco ta reconose e balor di evento manera esaki cu ta fortalece laso den nos comunidad y ta fomenta un sentido di aprecio profundo pa e herencia cultural di Aruba.

Aruba Bank ta felicita tur participante, finalistanan, y especialmente e ganadornan, cu a demonstra talento excepcional y cu a



contribui na e celebracion di e identidad nacional di Aruba. Alabes ta gradici nos comunidad cu a atende

e evento den gran forma y cu a pasa bishita nos photoboot.

Pabien na e ganadornan absoluto: Jair Buddy Vesprey y Jean-Paul Lacle.

RODERICK FRANKEN GANADOR DI PREMIO CULTURAL PLAYA PABAO 2025

Playa Pabao, Enconexion cu celebracion di himno y bandera, directiva di Centro di Bario Playa Pabao ta organisa un programa cultural. E actividad aki ta tuma luga na Centro di Bario Playa Pabao y lo cuminsa pa 12’or pm y lo termina pa 6’or pm. Lo tin presentacion di difirente grupo di baile y solista hubenil. Tambe lo tin un bar y cushina bon sorti. Durante e actividad lo tuma luga un homenahe na Roderick Franken cu e aña lo recebi e premio Cultural Playa Pabao 2025.

Kende ta Roderick Franken

Biografía

Rodrick Ronald Franken mihor conoci como Rocco a nace riba un 22 di February na aña 1986.

Rocco ta e yiu mas chikito di Seagrid Ras y Ronald Franken. Rocco a lanta den e bario di Tanki Leendert y cu su 9 aña a bin biba den e bario di Madiki Kavel.

Deporte

Su infancia tabata rondona di musica pero prome cu musica tabata deporte. E la practica e deportenan di baseball, futbol y volleyball. Pero baseball tabata unda e la sobresali mas cu tur. E la practica baseball for di su 5 te cu su 19 aña reperesentando Aruba varios biaha cu seleccion national. Tambe den su añanan bibando na Hulanda Rocco a hunga baseball profesional pa e ekipo di Tornado's di Den Haag pa 2 temporada.

Musica

Su prome experiencia riba escenario tbt cu su 9 aña di edad. Representando su team di baseball den un festival di Ranchera. Y no ta mucho despues cu e la cuminsa participa den festival di tumberito. Durante su participacionan den e festival di tumberito e la logra gana e titulo maximo 4 biaha (1 infantil, 3 hubenil). Despues a sigui den grandi y a logra e titulo di " Rey di tumba" na 3 ocasion. Te awe Rocco ta e unico cantante pa gana corona den infantil, hubenil y grandi.

Rocco a participa varios biaha na "Festival di

Tumba Curaçao". Clasificando den tur ocasion y tambe semper den e finalistanan. 3er finalista na 2014 y 2017 y 4to finalista na 2016 tabata su logro di mas grandi na e dicho festival. Ganador di " Festival un canto pa Aruba su Himno y Bandera" na aña 2021 y ganador di Aruba su " Groovy Soca Monarch" na aña 2024.

Bandanan musical

Na 2005 e la forma parti di su prome banda musical yama MEGA y despues e banda musical PRIVÉ na 2007. Na 2010 Rocco a bai studia na Hulanda y eynan a bin forma parti di Cache Deluxe cu despues a cambia nomber pa Cache Royale. Siendo den Cache e la gana experiencia biahando y cantando na Alemania, Belgie, Spanje, Aruba, Boneiro y Curaçao y a traha su nomber como cantante den farandula di e Islanan ABC. Na 2014 e la bin bek su Aruba y akinan hunto cu Dwight Leoneta, Jairo Evertsz y Krish Mahtani a dicidi di lanta nan mesun banda musical cu awe ta carga e nomber di "Buleria" cu awe ya tin 10 aña di existencia. Dia 5 di juni 2025 Rocco ta cumpli 30 aña den farandula.

POLIS A TOPA UN PAREHA CU AUTO DI HUUR PEGA DEN SANTO BLANCO NA EAGLE BEACH



Diasabra madrugá durante patruxa polis a bin topa un pareha turista cu un auto di huur pega den e santo blanco na Eagle Beach, mesora polis a para baha bay atende cu nan. A bin resulta cu e pareha no tabata sa cu esaki ta prohibi y a core un parti riba e santo blanco te cu nan chok.



CANDELA DESPUES DI UN EXPLOSION NA KAS PALOMA



Diasabra atardi a drenta informe di un explosion cu a ser scucha y candela cu a sigui na Kas Paloma, mesora a dirigi 2 unidad di bombero na e sitio. Na yegada di e prome unidad a bin compronde cu aki ta trata di un tanki chikito cu lo a explota y candela di sushedad a inicia. Mesora e bomberonan a cuminsa combati y paga e candela.




NA SERO JANCHI CHAUFFEUR A PERDE CONTROL BAY DAL UN CURA Y SIGUI CORE BAY



Diasabra mainta a drenta informe di un accidente na Sero Janchi, mesora a dirigi un patruya na e sitio. Na yegada di e patruya a bin compronde cu aki ta trata di un accidente hit & run unda un auto a perde control na un birada y a bay dal un cura di cas y a sigui core bay. Awor polis mester bay busca e auto cu a comete e destruccion di e cura.



DESCONOCIDONAN A AGREDI HOBEN DJ NA UN SNACKTRUCK NA PALM BEACH



Diadomingo mainta tempran a drenta informe di un pelea na un snacktruck na Palm Beach, mesora a dirigi 2 patruya na e sitio. Na yegada di e patruya a bin encontra cu un caso di maltrato di un hoben DJ cu a caba di cumpracuminda na e snack

unda na cierto momento un persona desconoci p'e hunto cu un otro hoben a bini di traicion y a cuminsa dal e cu mokete y nan lo a dal e cu un uheto duro te kibra su djientenan. Na un dado momento ela reconose e otro hoben cual tabata na un chines un rato prome den un trip y a kere cu e hoben aki lo a haya problema cun'e. Despues di a ricibi golpinan nan



a bandona e sitio y ela lanta pero despues lanta y a corda cu e tabata cu su pareha pero esaki a bay. Na yegada di e ambulans

ban a atende y a transporte pa hospital. Polis a avise cu e por entrega keho pa asina polis investiga e acto aki di maltrato abusivo.

Prome Minister Evelyn Wever-Croes:

DISCURSO DI PROME MINISTER EVELYN WEVER-CROES RIBA DIA DI HIMNO Y BANDERA
“Un pais sin su Bandera y sin su Himno ta un pais sin destino”

ORANJESTAD—Diamars mainta Prome Minister Evelyn Wever-Croes a duna un discurso elocuente durante e Acto Protocolar na ocasion di celebracion di Dia di Himno y Bandera.

Prome Minister:
Su Excelencia Gobernador di Aruba, Presidente di Parlamento, Vice Presidente di Parlamento y miembronan di Parlamento di Aruba y Corsou, Diputado, y miembronan di conseho insular di Boneiro, colega ministernan di Aruba, Cuerpo Consular y Invitadonan,
Masha masha pabien awe cu celebracion di nos Dia di Himno y Bandera y danki pa acepta nos invitacion, pa celebra e dia importante aki cu nos. Mi kier duna un danki special na esnan cu a bin di exterior pa ta cu nos awe.
Awe nos ta recorda cu 49 aña pasa, pa prome biaha, nos bandera a wordo hisa den stadion Guillermo Prospero Trinidad, e tempo ey conoci como Wilhelmina Stadion. Mes ora despues nos himno a wordo toca pa prome biaha.

Historia
Permiti mi bai un tiki den historia, 49 aña pasa, na aña 1976. Gobierno Insular di Aruba a tuma e decision cu 18 di maart ta bira nos Dia Nacional, esta nos Dia di Himno y Bandera. E tempo ey caba Betico Croes dfm, tabata lidera e lucha pa concretisa e deseo di nos pueblo pa bira un pais. Y e tabata sa cu un pais sin su bandera y sin su himno ta un pais sin destino

Den e cuadro aki un Comision di Himno a ser institui na januari 1976. Nan a propone pa haci e cancion popular ‘Aruba Dushi Tera’ e himno nacional di Aruba. E cancion aki, di Padu Lampe cu composicion di Rufo Wever, tabata hopi popular caba na Aruba desde añanan 50. Tambe a keda dicidi cu lo añadi un di tres couplet, di Hubert “Lio” Booi. E di tres couplet lo mester a expresa e deseo ferviente di nos pueblo e tempo ey, e di 3 couplet ta bisa:

Grandeza di bo pueblo ta su gran cordialidad
Cu Dios por guia y conserva su amor pa libertad

Gobierno Insular di Aruba a institui tambe un Comision di Bandera cu e tarea pa organisa un concurso den pueblo pa un diseño di un bandera di Aruba. A drenta no menos cu 693 proposicion. Di esaki e comision a propone na Eilandsraad: nos bandera blauw; pa e color di lama y di shelo,

dos strepi geel; pa e oro, aloe, industria y turismo, ariba un strea cora di 4 punta; cora pa e sanger di indian y e rand blanco rond di e strea pa nos playanan bunita.

Riba dia 16 di maart 1976, Eilandsraad a aproba ‘Aruba Dushi Tera’ como himno oficial di Aruba, y a aproba e diseño di e bandera oficial di Aruba.

Y dos dia despues, esta 18 di maart 1976, e acto oficial a tuma lugar, caminda a proclama oficialmente nos Himno y Bandera y esaki den presencia di miles di nos ciudadanonan.

Mescos cu varios di boso aki, ami tabata un di e ciudadanonan ey, e tempo ey mi tabata un mucha di 9 anja. Mira nos bandera wordo hisa pa prome biaha, y scucha e himno pa prome biaha como himno, a hasi un impresion grandi riba mi, un impresion cu ta keda cumi cada biaha cu mi mira nos bandera wordo hisa, y scucha e himno wordo toca y canta.

Bishita na scolnan
Pero e ta un experiencia aun mas emocionante, ora mi mira nos muchanan experiencia e mesun sensacion.
Ya desde cuminsamento di e luna aki nos tur por a sinti caba e vibracion pa loke ta e celebracion di nos Dia Nacional. E festivalnan di canto y poesia cu composicionnan y interpretacionnan sumamente bunita reflehando e amor pa nos pais; e ferianan cultural rond di henter nos isla; e marcha cultural di Colegio Pastoor Kranwinkel na Paradera siman pasa diabierna; e Manifestacion Cultural ayera nochí aki na Plaza Betico Croes cu un explosion di creatividad, innovacion y amor pa nos patria. Den number di Gobierno di Aruba mi ta gradici tur esnan cu a hasi tur e eventonan aki asina exitoso.

Den number di pueblo di Aruba mi kier expresa un danki special na nos maestro- y maestranan pa e forma con nan ta prepara nos alumnonan y celebra cu nan, nos Himno y nos Bandera. E aña aki mi tabata tin e honor di bishita varios scol atrobe, y e recepcion tabata hopi caluroso.
E parti mas mas special ta keda, na momento cu mi mira tur e alumnonan di scol, para hunto, uni dilanti nan scol. Y riba nan cara expresion di inocencia, entusiasmo y speransa, hisando e



bandera y cantando e himno, “uit volle borst”, manera na Prinses Amalia School siman pasa.

Danki pa sigui inculca den curason di nos muchanan, e amor pa nos Himno, nos Bandera y nos dushi Aruba. Asina, unda cu nan bai riba mundo, nan lo ta un embahador di Aruba, y representa Aruba dignamente. E ora nos por ta trankil, cu ora yega nan turno, nan lo cuida y stima e pida baranca aki, mes of mas hopi cu nos ta stim’e y ta traha p’e.

Nos Libertad
Nos Himno y nos Bandera ta simbolonan di nos libertad. Y esaki tabata un deseo ferviente di nos pueblo na anja 1976, ora ainda e pueblo di Aruba no tabata sa cu 10 aña despues nos lo logra nos Status Aparte.
Libertad ta un palabra significante pa tur pais na mundo cu den nan historia a biba y hiba un lucha a base di sanger, sodo y lagrima pa por a logra e ideal aki. Tin paisnan cu na e momentonan aki ta luchando pa conserva nan libertad.

E resiliencia di nos pueblo
Aruba tambe a hiba su bataya pa libertad, y esaki a ser realisa danki na e union di e pueblo Arubano. Un union caminda no ta reina division. Nos a prueba cu un pueblo uni hamas por ser hundi.
Y nos a demostra esaki na varios biaha den historia di nos pais, desde nos Status Aparte 39 aña pasa. Recien tambe, durante e pandemia mundial Covid-19, cu tabata tin un impacto devastador pa Aruba, tipifica pa hopi perdida, perdida di bida di familiar y amigonan, impacto riba salud; mental y fisico, interupcion den educacion, muchanan cu mester a separa di nan amigonan, perdida di entrada, perdida di negoshi y pa esnan mas vulnerable perdida di speransa.

Sinembargo un biaha mas, inspira pa nos himno y bandera, mes resiliente cu nos matanan di Watapana, mes firme cu nos barancanan den naturalesa, mes determina cu nos biento di pariba cu ta supla constante e nubianan di mal

tempo pa nan pasa bay, pa rayonan di solo bolbe briya. Asina, uni, nos a lucha y saca nos pais padilanti memey di e olanan bruto.Y danki na e esfuerso conhunto di tur ciudadano di nos pais y trahadonan den tur sector di nos comunidad, awe Aruba ta muestra un recuperacion impresionante.
Awe nos tin un economia den pleno progreso y stabil, danki na crecemento di nos turismo, maneho di finasas publico responsabel y sostenibel, cu pa di tres aña ta muestra surplusnan financiero, cu desempleo mas abou den ultimo 20 añanan.
Esaki a permiti nos di cuminsa duna bek na comunidad, y na esnan mas vulnerabel. Den e ultimo 7 añanan, apesar di e situacion dificil financiero di pais Aruba y di e fondo di SVB, a aumenta e pensioen 5 biaha, a aumenta e sueldo minimo 4 biaha, e proposicion pa e di 5 aumento ta na Parlamento pa wordo trata, a aumenta e gehandicapten uitkering y a duna empleadonan publico indexacion di salario despues di 8 aña.

E aña aki, 2025, ta premira un espacio financiero aun mas grandi, cu ta permiti pa duna aun mas bek na esnan mas vulnerabel. Estudionan pa yega na un entrada minimo social ta kedando cla, y e espacio financiero tambe tey. Cu esaki por yuda esnan mas vulnerabel den nos comunidad pa por tin un bida digno.
Nos no ta ainda caminda cu nos mester ta, tin retonan grandi ainda cu ta pidi atencion y solucion. Pero nos ta riba e bon caminda, pa hasi Aruba un pais mas fuerte y resiliente, cu por percura pa su mes, reflehando asina e espiritu patriotico di nos bandera y himno.
Hopi motibo pa ta orguyoso
Awe ta un dia pa pone tur diferencia un banda, y celebra ARUBA, nos baranca tan stima.Y nos tin hopi pa celebra. A pesar cu nos ta un isla chikito, nos a logra hopi. Desde un punto di

bista internacional, Aruba a desaroya den un isla fuerte, resiliente y exitoso den caribe. Nos ta un isla pionero den turismo, pa henter mundo.
-Aruba ta e pais mas sigur den nos region, segun The Telegraph di Inglatera,
-Nos Eagle Beach ta e beach #1 den Caribe, y #3 den mundo, segúnun Trip Advisor.
-Den innovacion, nos tin e “Aruba One Happy Pass”.
-Aruba a hala atencion internacional tambe, debi na e cantidad grandi di hende muhe den liderazgo, den e articulo “Aruba where women lead” di The New York Times.

Conclusion
Awe riba nos Dia Nacional, ban reconfirma nos compromiso pa sigui traha den union, pa sigui hiba nos dushi Aruba padilanti.
Cu mas recurso disponibel nos por sigui inverti den mehora e calidad di bida di nos conciudadanonan, creando progreso sostenibel y innovativo cu oportunidad pa nos muchanan y hobennan mayan y percurando cuido y un bida digno cu bienestar y trankilidad pa nos grandinan.

Mi kier gradici Comicion Celebracion Dianan Nacional y colega Minister di Cultura Xiomara Maduro, pa organisa e evento cultural di ayera nochí, y e Acto Protocolar di awe mainta, y tur esnan cu a y ta haci e celebracion henter e siman un exito.

Cu esaki tambe ta cuminsa mesora e preparacionnan pa e celebracion di 50 aña di Himno y Bandera y 40 aña di Status Aparte otro aña. Nos cada un, di awor caba, por cuminsa prepara pa e festividadnan ey.

Pueblo Arubano, ban celebra awe den grandi nos Dia Nacional.

Hisa bo bandera cu orguyo, pasobra awe nos ta un pais autonomo den Reino Hulandes cu nos propio simbolonan di Union y Libertad, nos Himno y nos Bandera. Pabien pueblo di Aruba cu nos gran dia!
Cu Dios Todopoderoso sigui bendiciona nos dushi pais Aruba.

Chauffeur di s.u.v. a bay purba parkeer net ora otro ta sali



Diabierna atardi a drenta informe di un accidente dilanti di DHL na Wayaca,

mesora a dirigi un patruya na e sitio. Na yegada di e patruya a

bin compronde cu aki ta trata di un accidente unda e chauffeur di un

s.u.v. a bay purba parkeer mientras otro auto ta sali y nan a dal den otro.

E daño ta minimal y afortunadamente ningun hende a resulta herida.

PAPAYA RANCH TA RINDI HONOR NA SR. HAIME Y SRA. BRIGIDA DIJKHOFF



Weekend próximo Papaya Ranch ta organiza su Torneo Himno y Bandera di bolas criollas cu un participación di 62 ekipo total. Cu gran aprecio Papaya Ranch ta rindi honor na sr. Haime y sra. Brigida Dijkhoff, fundador y hungadornan di ekipo Jairo's Bolas Team. Pa Haime y Brigida su gran

dedicación y amor pa bolas criollas pa mas di 20 aña, Papaya Ranch ta dedica e torneo aki na e gran persona nan aki..

Diadomingo 16 maart 2025 pa 9:45 mainta lo tuma inicio di Torneo Himno y Bandera di Bolas Criollas na Papaya Ranch unda sr. Haime y



sra. Brigida lo saca prome bola. Después weganan di infantil, hubenil, damas y caballeros lo sigui durante día te cu 7:00 di anochi. Dialuna 17 maart 2025 lo sigui cu e weganan y diamars 18 maart 2025 pa 10:00 mainta lo tin canto

di Himno y hisamento di Bandera pa despues ekiponan sigui batalla pa asina atardi tin e gran final pa haya resultado di Campeon, Sub-Campeon,

3er y 4to lugar den cada categoría. Tambe lo tin premio pa Mihor Boche y Mihor Arime den cada categoría. Pa culmina e torneo lo tin ambiente musical di Shine Music Aruba desde 5:00 atardi, bin baila y goza!

Papaya Ranch ta invita henter pueblo di Aruba pa bin duna honor y aprecio na sr. Haime y sra. Brigida Dijkhoff. Tambe bin apoya nos ekiponan di bolas criollas y pasa dia cu famia y disfruta di un bar bon surti y cushina crioyo crioyo!

Ban hunto celebra nos Dia Nacional y engrandece bolas criollas y deporte di Aruba en general.



Minister Maduro di Cultura: GOBIERNO DI ARUBA A RESERVA 4 MIYON FLORIN PA E RENOBACION DI E MONUMENTAL CAS DI CULTURA



Siman pasa Minister Maduro di Cultura tabata presente na Cas di Cultura pa e anuncio importante di e “E Brasa” cu ta nomber di e proyecto di renobacion di Cas di Cultura.

Un proyecto balora na 17 miyon florin pa cual Gobierno di Aruba a reserva 4 miyon florin pa conserva e monumento

special aki, cu ta un tarima cultural importante pa Aruba pa mas di 65 aña brindando espacio pa diferente forma di expresion di arte y cultura na nos Pais.

Aparte di e renobacion di e parti monumental di Cas di Cultura, den cual lo drecha e escenario y ekipa esaki cu e tecnica moderno necesario,

luznan adecua y sientanan confortabel, e edificio lo wordo amplia cu un brasa cada banda pa asina extende e espacio y amplia e posibilidadnan pa arte y cultura por wordo expresa y admira optimalmente.

Minister Maduro di Cultura ta satisfecho di por a logra pa Gobierno di Aruba pone 4 miyon florin disponibel pa asina


e proyecto di renobacion aki, cu ta un soño y esfuerzo di e ekipo di Cas di Culturq desde aña 2017, porfin por ranca sali y bira un realidad.

E mandatario ta haci un yamada tambe na tur instancia y persona cu ta stima Aruba su cultura, pa brasa e proyecto importante aki cu un aporte financiero, pa asina

sigura cu Cas di Cultura por yega na e fondonan necesario pa e renobacion.

Minister Maduro ta gradici y felicita e ekipo di Cas di Cultura cu e bunita proyecto aki y ta spera cu mas instancia y persona pronto tambe por aporta pa asina nos tur por sigura cu Cas di Cultura por sigui ta nos centro cultural pa por lo menos 30 aña mas.

Chauffeur herida den accidente di trafico na Piedra Plat



Piedra Plat - Diahuebs den oranan di atardi algo pasa di 6'or a sosode un boksmento entre dos vehiculo, ariba e caminda

pabou di Bright Bakery.

Tawata trata di un Nissan pickup y un Toyota Yaris.

Polis y Forensys mester a presenta, y na e sitio a compronde cu lo bay tin mester di ambulance tambe. Chauffeur di e pickup un cabayero nos a comprone lo a herida su mes durante e impacto.

Na e sitio nos por a mira un di Formadornan di e Gobierno nobo cu ta Sra. Gerlien Croes.

Na e sitio nos a compronde cu un famia di dje lo tawata na stuur di pickup. Segun tawata ser bisa cu



ta un mayor di dje, esta su tata.

Ambulance ayegaymesora a atende cu e cabayero y dun'e e asistencia medico necesario.

Polis di trafico y Forensys a haci na parti, esta di tuma datos y regla pa takelwagen move ambos vehiculo cu no por a move ariba nan mes.

LA CABANA BEACH RESORT & CASINO A CELEBRA DIA DI HENDE MUHE DEN GRAN FORMA



EAGLE BEACH - Dia Internacional di Henden Muhe a enfoca riba empodera otro y inspiracion na La Cabana Beach Resort & Casino e siman cu a pasa. Hotel a ofrece su empleadonan femenino un evento hopi special hunto cu un invitado special, Tisa LaSorte.

E hotel a wordo honra den yama bon bini n'e prome CEO & Presidente femenino di Aruba Hotel and Tourism Association (AHATA) kende a comparti su tremendo trayectoria y papia tocante su contribucionnan significante n'e industria di turismo riba nos isla.

Su storia di perseverancia,

liderazgo y exito a brinda hopi conocimiento valioso den loke ta su crecimiento personal y profesional. For di comiensonan humilde te na su posicion actual di liderazgo. LaSorte tambe a toca e retonan cu el a enfrenta manera un hende muhe y metanan cu el a logra.

Adicionalmente na su storia personal, el a toca tambe un poco riba loke ta e estado actual di Aruba su turismo, ofreciendo asina un comprension mas profundo n'e audiencia presente riba loke ta e impacto di tur esaki na nos comunidad.

E event a keda modera pa Assistant General Manager, Jessica Franken,

kende a facilita un discusion hopi interactivo.

E empleadonan femenino na La Cabana a keda inspira y motiva pa medio di LaSorte, kende a nace y lanta aki mes na Aruba, yiu muhe di gobernador anterior y teniente Oscar Henriquez. Den su posicion como CEO di AHATA y presidente, e ta enfoca riba sostenibilidad, y educacion, promoviendo accionnan cu ta beneficia e comunidad completo como tambe e industria riba su mes.

Un grandi enorme ta bay na tur organisadonan, Human Resources, Social Committee, Food & Beverage, y Jessica



Franken pa haci e evento aki posibel. Tambe un caluroso danki na Tisa pa inspira e audiencia y comparti su experiencianan.

**PUEBLO A HAÑA SU
PEN BEK**

Pa kualkier informacion
solodipueblo@gmail.com
of
585-9500

Compromiso pa Prevencion di Abuso di Mucha

Nos muchanan ta e miembronan mas vulnerabel di nos sociedad y ta nos compromiso pa protehanan. Desde inicio na 2017 a bin subraya e necesidad di mas atencion, conscientisacion, cambio di ley, derecho di mucha pero sigur tambe prevencion. Nos muchanan mester mas cu wordo mira como e futuro di nos Pais, nan tin mester di wordo proteha for di chikito.

Como mandatario nos tin e deber pa tuma paso concreto pa trece e tema crucial aki padilanti y nos a bin ta haci esaki tambe desde cu a sinta na september 2021.

Gobierno di Aruba a bin ta reconoce e necesidad urgente pa mas concientisacion y accion, y a oficialmente declara luna di April como Luna

di Prevencion di Abuso di Mucha na Aruba aña pasa. E iniciativa aki ta enfoca riba e causanan, prevencion y intervencion necesario pa combati abuso di mucha den tur forma.

Durante conseho di minster, un proposicion a wordo presenta pa designa permanentemente April como Luna Nacional di Prevencion di Abuso di Mucha, sigurando cu tur aña, e institucionnan gubernamental y organisacionnan relevante ta traha pa aumenta concientisacion y fortifica proteccion pa nos muchanan.

A traves di diferente plataforma politico, como partner di coalicion a enfatisa continuamente e importancia di proteccion di mucha y a pusha pa politiconan enfoca riba

deteccion tempran, intervencion y prevencion di abuso.

“Tur mucha merece crece den un ambiente sigur y cu amor. Haciendo prevencion di abuso di mucha un prioridad nacional, nos ta tuma un paso crucial pa stop e ciclo di violencia y pa sigura un futuro mas saludabel pa e hubentud di Aruba, ambos fisicamente y mentalmente,” segun Minister Arends.

E iniciativa aki ta alinea cu esfuersonan global, manera e National Child Abuse Prevention Month cu a wordo estableci na Merca for di 1983, y campananan similar na Colombia y Mexico. E ta reforsa e compromiso di Aruba cu e standardnan internacional pa proteccion di mucha y e responsabilidad colectivo



di nos comunidad pa combati e problema aki.

Mientras ta traha pa formalisa e iniciativa aki, nos como comunidad mester sigui boga pa Parlamento y Gobierno continua duna prioridad na nos muchanan por ehempel e ley di iniciativa pa derecho di mucha.

Palabra di gradicimento y danki na tur institucion, educadornan, cuidadornan y lidernan di comunidad cu a bin ta participa activamente den e actividadnan di concientisacion durante luna di april y pa sigui traha pa proteha nos muchanan ful aña.

Accidente banda di Great Rich na Paradera

Diasabra mainta a drenta informe di un accidente banda di Great Rich na Paradera, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda cu un chauffeur cu a bay subi e crusada no a pone bon atencion y a bay dal tras di e auto su dilanti.

Afortunadamente ningun hende a resulta herida.



Homber bebi a perde control riba un bais electrico y a bay dal 2 auto y kap su cabes



Diasabra madruga a drenta informe di un accidente cu hende herida na Matadera, mesora a dirigi tanto polis como ambulans na e sitio. Na yegada di e patruya a bin compronde cu aki ta trata di un homber bebi a perde control cu un bicicleta electrico bay dal riba un auto staciona dal abao kap su cabes y e bicicleta mes a bay dal un di 2 auto tambe staciona. Debi na e caida ela ricibi un kap na cabes cual tabata sangrando, na yegada di e ambulans nan a atende e ciclista y a transporte pa hospital.

POLIS A BAY INTERMEDIA ENTRE TURISTANAN CU DI COSTUMBER NAN TA PAPIA DEN BOS HALTO




Diasabra madruga a drenta informe di cu posiblemente lo tin un problema entre turistanan na Palm Beach, mesora a dirigi un patruya na e sitio. Na yegada di e patruya a bin compronde cu aki no ta trata di ningun problema, unicamente pa costumber nan ta papia den bos halto y esey a crea e impresion ca nan lo tin problema.















E turistanan a bisa cu es



mas nan ta rumbo pa bay descansa. Polis a nota cu nan a bay y polis a sigui cu nan patruya.



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Anochi - March 18, 2025

 <div>Sorteo # 8499 2379 0221 9346</div>  <div>FP</div>  <div>Sorteo # 7543 1322</div>  <div>X2</div>  <div>Sorteo # 2248 8078</div>  <div>Sorteo # 6302 7927 Scorpio</div>  <div>Sorteo # 1232 351</div>  <div>X2</div>	 <div>Sorteo # 0 x Jackpot 0 x Match 4+ 2 x Match 4 91 x Afl. 12,00</div>	<div>Joker Letter</div> <div>Proximo Jackpot</div> <div>200.000,-</div>	 <div>Sorteo # 6773 2 x Jackpot 71 x Match 4 1621 x Afl. 8,00</div>	<div>04-12-19-21-27</div> <div>Proximo Jackpot</div> <div>50.000,-</div>	 <div>Sorteo # 1750 0 x Jackpot 3 x match 4 2 x Afl. 500,00 71 x Afl. 50,00 67 x Afl. 15,00</div>	<div>05-07-17-18</div> <div>Mega Ball 14</div> <div>Proximo Jackpot</div> <div>300.000,-</div>	 <div>Afl. 420.000,-</div>	 <div>Sorteo #</div> <div></div> <div></div> <div></div> <div></div>	
---	--	--	--	---	--	---	--	---	---

ARTBO KIER A MANDA FELICITACION PA E
DI 3 EDICION DI TOPETHON CU A ORGANISA
DOOR DI IMPACT TAEKWONDO Y TIGER
TAEKWONDO ACADEMY



Diasabra, 15 di maart 2025
tabata tin e tremendo di 3
edicion di topethon. Unda
cu muchanan di diferente
scol a bin unrato pa
demostra nan talento.

Nos kier felicita tur atleta
y coach nan cu e evento
aki.

Union ta haci forza

Clasificados





SOLODIPUEBLO@GMAIL.COM

CEL.585 9500



SUDOKU

8			3					
3					5			
		9	1		4			
	4			8		7		
6								2
		8		2			3	
			7		9	6		
			2					5
					8			4

		9	8				4	
4				5				
			7	1				9
						8		1
	5	8				4	7	
6		3						
5				7	1			
				4				2
	7				9	1		

		7	1				5	
				7	4	8		
	2		3	8			7	6
				4	8		1	9
		8				5		
6	9		5	3				
8	7			1	9		3	
		3	8	5				
	1				3	9		

BON NOTICIA

BO TA DEN E UNICO IGLESIA DI HESUS PA E REINO DI CIELO OF BO TA DEN UN SECTA CU HENDE A LANTA PA FIERNO?

Bijbel Exodo 24: 7- 8, den e Evangelio aki, Dios Tata a cera e prome Aliansa cu e pueblo di Israel, pa medio di Moises. Bijbel 2 Samuel 7: 16, den e Evangelio aki, Dios Tata a eligi David, pa bira e prome Rey di Israel. Dios Tata a priminti Rey David cu su sucesornan,nan lo ta pa semper encabesa e Reino di Dios. Bijbel Mateo 26: 26 – 28, den e ultima cena Hesus a bisa Su apostelnan: “Bos tur bebe for di e copa di binja aki, esaki ta Mi Sanger, e Sanger cu ta confirma e Aliansa cu Mi ta derama pa hopi hende, pa pordon di pikanan.” Akinan Hesus ta confirma Su Sacrificio y morto na crus, deramando Su Sanger precioso, pa e Aliansa Nobo di Dios Tata, cu ta e pueblo Nobo di Israel. Bijbel Lucas 1: 32 – 33, ta bisa: “Senjor Dios lo duna Hesus e trono di Su antepasado Rey David y te den eternidad lo E ta Rey di e descendientenan di Jacob y Su Reino lo no tin fin.” Bijbel Mateo 16: 15 – 19: “Hesus a puntra Su apostelnan: Anto boso mes, ta ken boso ta bisa

Mi ta? Simon a contesta: Bo ta E Mesias, E Yiu di Dios bibo! Hesus a bis’e: Felis bo ta Simon yiu di Huan, pasobra no ta hende a revela bo esaki, ma Mi Tata cu ta den Cielo. Mi ta bisa bo: Abo ta Pedro (o sea baranca) y riba es baranca aki, lo Mi lanta Mi Iglesia y forsanan di fierno lo no podera di dj’e. Lo Mi duna bo e yabinan di Reino di Cielo y loke bo prohibi na tera, ta prohibi den Cielo tambe y loke bo permiti na tera, lo ta permiti den Cielo tambe.” Akinan Hesus ta bisa bon cla, Mi Iglesia, osea un solo Iglesia y no Iglesiasnan. E demonionan den fierno lo lanta diferente sectanan na mundo, pa podera y pa kibra e Iglesia di Hesus, pero nan lo no logra. Hesus a duna Simon e nomber Pedro, cu ta significa baranca, cabes visibel di Su Iglesia. Hesus a duna Pedro e yabinan di Reino di Cielo y esaki ta significa, cera of habri e unico portanan pa laga e almanan drenta den Reino di Cielo. Hesus a duna e autoridad na Pedro pa dirigi Su Iglesia, di loke ta

permiti y di loke ta prohibi. Bijbel Marco 16: 15 – 16, aki Hesus ta bisa Su apostelnan: “Sali pasa na henter mundo y predica e Evangelio pa henter humanidad.” E palabra, sali pasa na henter mundo y predica e Evangelio pa henter humanidad, ta significa, Universal, Hesus Su Iglesia ta Universal. E Iglesia Universal di Hesus, ta e pueblo Nobo di Israel di Dios Tata den e Aliansa Nobo. Awor, tur e sectanan na mundo y e Hudiunan mes, nan mester kere den Cristo-Hesus y nan mester drenta y bautisa den E Iglesia Universal di Hesus, pa nan por drenta den e Reino di Cielo. Hesus a duna Su apostelnan, Su doctrinanan di Gracianan di salvacion pa Iglesia: Bautismo Mateo 28: 19 – 20, Confirmacion

Echonan di Apostelnan 2: 1 – 4, Confesion Huan 20: 23, Eucaristia Lucas 22: 19 – 29, Matrimonio Mateo 19: 4 – 6, Apostolado Marco 3: 13 – 19, Enfermonan Hacobo 5: 14 – 15. Awor puntra bo mes, ta di con tin tanto sectanan na mundo y mientras ta un Iglesia Hesus a lanta? Na anja 1521, Martin Luther, a inventa e theoria di e interpretacion liber di Bijbel. E interpretacion liber aki, a produci 36.000 diferente sectanan y oposicionnan na mundo. Tur e sectanan aki, ta pretende di ta di Hesus. Durante tempo, hopi di nan a lanta nan mesun religionnan y predicando e Bijbel den nan mesun manera y buscando hendenan debil den fe pa sigi nan. di Bijbel Echonan Apostelnan 20: 28 – 30, carta di San Pablo na su coleganan


Apostelnan: “Cuida boso y di henter e rebanjo na cual Spirito Santo a pone boso como Obisponan pa warda e Iglesia di Senjor, na cual E’l a gana cu Su propio Sanger. Mi sabi cu despues di mi partida, lo drenta lobonan feros cu lo no tene compasion cu e rebanjonan y cu denter di boso mes, lo surgi hendenan cu lo sinja doctrinanan robes y nan lo gana discipelnan nan tras.” Ta manera cu Hesus a bisa den, Bijbel Mateo 16: 18, cu forsanan di fierno lo purba podera y kibra e Unico Iglesia Universal di Hesus, pero nan lo no logra. Husga pa bo mes. Nunca no ta laat pa compronde e berdad y pa comberti.

Scirbi pa Seferino Tromp
Un mensahero di Dios.

**Pa Orashion prome
cu entiero
ESTA VIGILIA
y orashion despues
di entiero esta
OCHO DIA
por jama
Atanasio Brema**

**Cel. 569 2763
of 568 6141**

SEMPER NA BO ORDO





Oracion di dia

Un feliz dia bendiciona yena cu gracia di Dios

”Lo Bo ta sacerdote pa semper na e mesun manera cu Melkisedec.”
(Hebreunan 7, 17b)

Ruman aki nos ta mira Hesus cu e titulo Sacerdote/Rey di Husticia pa semper, bunita titulo pa Hesus aunke Hesus no mester di ningun introduccion of titulo paso E ta Dios y Dios ta Amor. Asina mes den Hesus nos por experencia Amor, E Amor Unico cu nos tur ta anhela consciente y inconscientemente nos tur ta anhela di experencia E Amor di Dios.

Ta dificil pa esey sosode? Ta bon pa nos sa cu tur cos ta depende di con habri nos curason ta pa Hesus y con nos ta permiti Spirito Santo move den nos.

Diadomingo nos a scucha cu nos tin e donnan y awor ta keda nos nada mas cu resa y pidi Spirito Santo habri nos curason pa nos experencia y pone e donnan den practica y asina acepta y cumpli cu Dios su boluntad den nos bida y nos biba!

Oracion:Hesus mare nos tur por reconoce cu Abo ta nos Rey di Husticia y acerca Bo curason misericordioso pa nos salvacion.

Amen